



禮儀典第二百九十四卷

巡狩部彙考二

漢

高祖二年冬十月如陝鎮撫關外父老 按漢書高祖本紀云云

文帝三年五月幸甘泉七月自太原至長安 按漢書文帝本紀三年夏五月匈奴入居北地河南爲寇上幸甘泉遣丞相灌嬰擊匈奴匈奴去發中尉材官屬衛將軍軍長安上自甘泉之高奴因幸太原見故羣臣皆賜之舉功行賞諸民里賜牛酒復晉陽中都民三歲租留游太原十餘日秋七月上自太原至長安

文帝十年冬行幸甘泉 按漢書文帝本紀云云

文帝十一年冬十一月行幸代春正月上自代還 按漢書文帝本紀云云

文帝十五年夏四月上幸雍始郊見五帝修名山大川嘗祀而絕者有司以歲時致禮 按漢書文帝本紀云云

古今圖書集成
景帝中六年冬十月行幸雍郊五時 按漢書景帝本紀云云

武帝元光二年冬十月行幸雍祠五時 按漢書武帝本紀云云

元光六年夏六月行幸雍 按漢書武帝本紀云云

元狩元年冬十月行幸雍祠五時獲白麟作白麟之歌 按漢書武帝本紀云云

元鼎四年巡省豫州詔封周後以奉周祀 按漢書武帝本紀元鼎四年冬十月行幸雍祠五時賜

民爵一級女子百戶牛酒行自夏陽東幸汾陰十一月甲子立后土祠于汾陰脽上禮畢行幸滎陽

還至洛陽詔曰祭地冀州瞻望河洛巡省豫州觀于周室邈而無祀詢問耆老迺得孽子嘉其封嘉

爲周子南君曰奉周祀

元鼎五年冬十月行幸雍祠五時遂踰隴登空同西臨祖厲河而還 按漢書武帝本紀云云

元封元年帝巡邊擇兵振旅還登嵩高封泰山周行海上 按漢書武帝本紀元封元年冬十月詔

曰南越東甌咸伏其辜西蠻北夷頗未輯睦朕將巡邊垂擇兵振旅躬秉武節置十二部將軍親帥

師爲行自雲陽北歷上郡西河五原出長城北登單于臺至朔方臨北河勒兵十八萬騎旌旗徑千

餘里威振匈奴遣使者告單于曰南越王頭已懸于漢北闕矣單于能戰天子自將待邊不能亟來臣服何但亡匿幕北寒苦之地爲匈奴讐焉還祠黃帝于橋山迺歸甘泉春正月行幸緱氏詔曰朕用事華山至于中嶽獲駿麋見夏后啟母石翌日親登嵩高御史乘屬在廟旁吏卒咸聞呼萬歲者三登禮罔不答其令祠官加增太室祠禁無伐其草木呂山下戶三百爲之奉邑名曰崇高獨給祠復亡所與行遂東巡海上夏四月癸卯上還登封泰山降坐明堂詔曰朕以眇身承至尊兢兢焉惟德菲薄不明于禮樂故用事八神遭天地況施著見景象屑然如有聞震于怪物欲止不敢遂登封泰山至于梁父然後升禮肅然自新嘉與士大夫更始其以十月爲元封元年行所巡至博奉高蛇丘歷城梁父民田租逋賦貸已除加年七十以上孤寡帛人二匹四縣無出今年算賜天下民爵一級女子百戶牛酒行自泰山復東巡海上至碣石自遼西歷北邊九原歸于甘泉

按通志禮略

元封初復至海上又北至碣石又自遼西歷北邊至九原五月乃至甘泉周萬八千里

元封二年幸雍至東萊還祠泰山

按漢書武帝本紀元封二年冬十月行幸雍祠五時春幸緱氏

遂至東萊夏四月還祠泰山至瓠子臨決河命從臣將軍以下皆負薪塞河隄作瓠子之歌赦所過

徒賜孤獨高年米人四石還作甘泉通天臺長安飛廉館

元封四年幸雍北出蕭關還幸河東 按漢書武帝本紀元封四年冬十月行幸雍祠五時通回中道遂北出蕭關歷獨鹿鳴澤自代而還幸河東春三月祠后土詔曰朕躬祭后土地祇見光集於靈壇一夜三燭幸中都宮殿上見光其赦汾陰夏陽中都死罪以下賜三縣及楊氏皆無出今年租賦元封五年冬南巡狩至于盛唐還封泰山幸甘泉 按漢書武帝本紀元封五年冬行南巡狩至于盛唐望祀虞舜于九嶷登瀛天柱山自尋陽浮江親射蛟江中獲之舳艫千里薄樅陽而出作盛唐樅陽之歌遂北至琅邪並海所過禮祠其名山大川春三月還至泰山增封甲子祀高祖於明堂以配上帝因朝諸侯王列侯受郡國計夏四月詔曰朕巡荆揚輯江淮物會大海氣以合泰山上天見象增修封禪其赦天下所幸縣毋出今年租賦賜鰥寡孤獨帛貧窮者粟還幸甘泉郊泰畤

元封六年行幸回中及河東 按漢書武帝本紀元封六年冬行幸回中春作首山宮三月行幸河東祠后土

太初元年冬十月行幸泰山十二月臨勃海春還幸甘泉 按漢書武帝本紀太初元年冬十月行

幸泰山十一月甲子朔旦冬至祀上帝于明堂十二月禮高里祠后土東臨勃海望祀蓬萊春還受計于甘泉

太初三年東巡海上 按漢書武帝本紀太初三年春正月行東巡海上夏四月還修封泰山禮石闕

天漢元年春正月行幸甘泉郊泰畤三月行幸河東祠后土 按漢書武帝本紀云云

天漢二年春行幸東海還幸回中 按漢書武帝本紀云云

天漢三年行幸泰山還幸北地 按漢書武帝本紀天漢三年春三月行幸泰山修封祀明堂因受計還幸北地祠常山瘞元玉夏四月赦天下行所過毋出田租

太始二年春正月行幸回中 按漢書武帝本紀云云

太始三年幸甘泉及東海 按漢書武帝本紀太始三年春正月行幸甘泉宮饗外國客二月令天下大酺五日行幸東海獲赤鴈作朱鴈之歌幸琅邪禮日成山登之罘浮大海山稱萬歲冬賜行所過戶五千錢鰥寡孤獨帛人一匹

太始四年三月行幸泰山四月幸不其五月還幸建章宮十二月幸雍至安定北地 按漢書武帝本紀太始四年春三月行幸泰山壬午祀高祖于明堂以配上帝因受計癸未祀孝景皇帝于明堂甲申修封丙戌禋石闕夏四月幸不其祠神人于交門宮若有鄉坐拜者作交門之歌五月還幸建章宮大置酒赦天下十二月行幸雍祠五時西至安定北地

征和三年春正月行幸雍至安定北地 按漢書武帝本紀云云

征和四年行幸東萊 按漢書武帝本紀征和四年春正月行幸東萊臨大海三月上耕于鉅定還幸泰山修封庚寅祀于明堂癸巳禋石闕夏六月還幸甘泉

後元元年行幸甘泉遂幸安定 按漢書武帝本紀後元元年春正月行幸甘泉郊泰時遂幸安定二月詔曰朕郊見上帝巡于北邊見羣鶴留止目不羅罔靡所獲獻薦于泰時光景並見其赦天下宣帝神爵元年春正月行幸甘泉郊泰時三月行幸河東祠后土 按漢書宣帝本紀云云

元帝永光五年冬上幸長楊射熊館 按漢書元帝本紀云云

成帝永始四年行幸甘泉及河東 按漢書成帝本紀永始四年春正月行幸甘泉郊泰時三月行

幸河東祠后土

按冊府元龜永始四年三月行幸河東祠后土帝乃帥羣臣橫大海溱汾陰既

祭行遊介山回安邑顧龍門監鹽池登歷觀陟西嶽以望八荒迹殷周之虛眇然以思唐虞之風

新莽天鳳元年欲行巡狩之禮以羣公奏乃止按漢書王莽傳天鳳元年正月赦天下莽曰予以

二月建寅之節行巡狩之禮太官齋糒乾肉內者行張坐臥所過毋得有所給予之東巡必躬載耒

每縣則耕耒勸東作予之南巡必躬載耨每縣則薅耒勸南僞予之西巡必躬載鉏每縣則穫以勸

西成予之北巡必躬載拂每縣則粟以勸蓋臧畢北巡狩之禮卽於土中居雒陽之都焉敢有趨謹

犯法輒以軍法從事羣公奏言皇帝至孝往年文母聖體不豫躬親供養衣冠稀解因遭棄羣臣悲

哀顏色未復飲食損少今一歲四巡道路萬里春秋尊非糒乾肉之所能堪且無巡狩須闋大服以

安聖體臣等盡力養牧兆民奉稱明詔莽曰羣公羣牧羣司諸侯庶尹願盡力相帥養牧兆民欲以

稱予繇此敬聽其助之哉毋食言焉更以天鳳七年歲在大梁倉龍庚辰行巡狩之禮厥明年歲在

實沈倉龍辛巳卽土之中雒陽之都迺遣太傅平晏大司空王邑之雒陽營相宅兆圖起宗廟社稷

郊兆云

後漢

世祖建武三年行幸春陵 按後漢書世祖本紀建武三年冬十月壬申幸春陵祠園廟因置酒舊宅大會故人父老十一月乙未至自春陵

建武四年幸鄴及盧奴諸邑 按後漢書世祖本紀建武四年夏四月丁巳幸鄴己巳進幸臨平五月進幸元氏辛巳進幸盧奴六月辛亥車駕還宮七月丁亥幸譙八月戊午進幸壽春冬十月甲寅車駕還宮十一月丙申幸宛十二月丙寅進幸黎丘

建武九年夏六月丙戌幸緱氏登輶轡 按後漢書世祖本紀云云

建武十七年南巡狩 按後漢書世祖本紀建武十七年夏四月乙卯南巡狩皇太子及右翊公輔楚公英東海公陽濟南公康東平公蒼從幸潁川進幸葉章陵五月乙卯車駕還宮

建武十八年春二月甲寅西巡狩幸長安 按後漢書世祖本紀云云

建武十九年南巡狩 按後漢書世祖本紀建武十九年秋九月南巡狩壬申幸南陽進幸汝南南頓縣舍置酒會賜吏人復南頓田租歲父老前叩頭言皇考居此日久陛下識知寺舍每來輒加厚

恩願賜復十年帝曰天下重器常恐不任日復一日安敢違期十歲乎吏人又言陛下實惜之何言謙也帝大笑復增一歲進幸淮陽梁沛

建武二十年東巡狩 按後漢書世祖本紀建武二十年春二月戊子車駕還宮冬十月東巡狩甲午幸魯進幸東海楚沛國十二月壬寅車駕還宮復濟陽縣徭役六歲

建武三十年東巡狩 按後漢書世祖本紀建武三十年春二月東巡狩甲子幸魯進幸濟南閏月癸丑車駕還宮秋七月丁酉幸魯國復濟陽縣是年徭役冬十一月丁酉至自魯

中元元年正月東巡狩四月還宮行幸長安 按後漢書世祖本紀中元元年春正月丁卯東巡狩二月己卯幸魯進幸太山北海王興齊王石朝於東嶽辛卯柴望岱宗登封太山甲午禪於梁父夏四月癸酉車駕還宮己卯改年爲中元行幸長安戊子祀長陵五月乙丑至自長安

明帝永平二年西巡狩 按後漢書明帝本紀永平二年冬十月甲子西巡狩幸長安祠高廟遂有事於十一陵歷覽館邑會郡縣吏勞賜作樂十一月甲申遣使者以中牢祀蕭何霍光帝謁陵園過式其墓進幸河東所過賜二千石令長以下至於掾史各有差癸卯車駕還宮

永平五年冬十月行幸鄴與趙王栩會鄴 按後漢書明帝本紀云云

永平六年幸魯及陽城 按後漢書明帝本紀永平六年冬十月行幸魯祠東海恭王陵會沛王輔楚王英濟南王康東平王蒼淮南王延琅邪王京東海王政十二月還幸陽城遣使者祠中嶽壬午車駕還宮

永平十年南巡狩 按後漢書明帝本紀永平十年夏閏四月甲午南巡狩幸南陽祠章陵日北至又祠舊宅禮畢召校官弟子作雅樂奏鹿鳴帝自御埴簾和之以娛嘉賓還幸南頓勞饗三老官屬冬十月徵淮陽王延會平輿徵沛王輔會睢陽十二月甲午車駕還宮

永平十三年巡行河渠因度河登太行進幸上黨 按後漢書明帝本紀永平十三年夏四月辛巳行幸滎陽巡行河渠乙酉詔曰今五土之宜反其正色濱渠下田賦與貧人無令豪右得固其利因遂度河登太行進幸上黨壬寅車駕還宮

永平十五年東巡狩 按後漢書明帝本紀永平十五年春二月庚子東巡狩辛丑幸偃師徵沛王輔會睢陽進幸彭城癸亥帝耕於下邳三月徵琅邪王京會良成徵東平王蒼會陽都又徵廣陵侯

及其三弟會魯祠東海恭王陵還幸孔子宅祠仲尼及七十二弟子親御講堂命皇太子諸王說經又幸東平辛卯進幸大梁至定陶祠定陶恭王陵夏四月庚子車駕還宮

章帝建初七年九月幸偃師東至河內幸鄴還宮十月西巡狩按後漢書章帝本紀建初七年秋九月甲戌幸偃師東涉卷津至河內下詔曰車駕行秋稼觀收穫因涉郡界皆精騎輕行無它輜重不得輒修橋道遠離城郭遣吏逢迎刺探起居出入前後以爲煩擾動務省約但患不能脫粟瓢飲耳所過欲令貧弱有利無違詔書遂覽淇園已酉進幸鄴勞饗魏郡守令已下至於三老門闕走卒賜錢各有差勞賜常山趙國吏人復元氏租賦三歲辛卯車駕還宮冬十月癸丑西巡狩幸長安丙辰祠高廟遂有事十一陵遣使者祠太上皇於萬年以中牢祠蕭何霍光進幸槐里岐山得銅器形似酒罇獻之又獲白鹿帝曰上無明天子下無賢方伯人之無良相怨一方斯器亦曷爲來哉又幸長平御池陽宮東至高陵造舟于涇而還每所到幸輒會郡縣吏人勞賜作樂十一月詔勞賜河東守令掾以下十二月丁亥車駕還宮按韋彪傳建初七年車駕西巡狩以彪行太常從數召入問以三輔舊事禮儀風俗彪因建言今西巡舊都宜追錄高祖中宗功臣褒顯先勳紀其子孫帝納之

建初八年東巡狩 按後漢書章帝本紀建初八年冬十二月甲午東巡狩幸陳留梁國淮陽潁陽

戊申車駕還宮

元和元年南巡狩 按後漢書章帝本紀元和元年秋八月丁酉南巡狩詔所經道上郡縣無得設儲峙命司空自將徒支柱橋梁有遣使奉迎探知起居二千石當坐其賜鰥寡孤獨不能自存者粟人五斛九月辛丑幸章陵祠舊宅園廟見宗室故人賞賜各有差冬十月己未進幸江陵詔廬江太守祠南嶽又詔長沙零陵太守祠長沙定王春陵節侯鬱林府君還幸宛十一月己丑車駕還宮賜從者各有差

元和二年東巡狩進幸魯北登太行 按後漢書章帝本紀元和二年春二月丙辰東巡狩己未鳳凰集肥城乙丑帝耕於定陶詔曰三老尊年也孝悌淑行也力田勤勞也國家甚休之其賜帛人一匹勉率農功使使者祠唐堯于成陽靈臺辛未幸太山柴告岱宗有黃鵠三十從西南來經祠壇上東北過于宮屋翱翔升降進幸奉高壬申宗祠五帝于汶上明堂癸酉告祠二祖四宗大會外內羣臣丙子詔曰朕巡狩岱宗柴望山川告祠明堂以章先勳其二王之後先聖之裔東后蕃衛伯父伯

兄仲叔季弟幼子童孫百僚從臣宗室衆子要荒四裔沙漠之北蔥嶺之西冒彫之類跋涉懸度陵
踐阻絕駿奔郊時咸來助祭祖宗功德延及朕躬予一人空虛多疚纂承尊明盥洗享薦慚愧祇栗
詩不云乎君子如祉亂庶遄已歷數旣從靈耀著明亦欲與士大夫同心自新其大赦天下諸犯罪
不當得赦者皆除之復博奉高嬴無出今年田租芻稿戊寅進幸濟南三月己丑進幸魯祠東海恭
王陵庚寅祠孔子于闕里及七十二弟子賜褒成侯及諸孔男女帛壬辰進幸東平祠憲王陵甲午
遣使者祠定陶太后恭王陵乙未幸東阿北登太行山至天井關夏四月乙卯車駕還宮 按張酺
傳顯宗置五經師酺以尙書教授數請于御前遂令入授皇太子及肅宗卽位數月出爲東郡太守
元和二年東巡狩幸東郡引酺及門生并郡縣掾史並會庭中帝先備弟子之儀使酺講尙書一篇
然後修君臣之禮賞賜殊特莫不沾洽 按通志禮略元和二年四月還京師庚申告至祠高祖
光武廟各一特牛

元和三年北巡狩 按後漢書章帝本紀元和三年春正月丙申北巡狩濟南王康中山王焉西平
王羨六安王恭樂成王黨淮陽王昞任城王尙沛王定皆從辛丑帝耕于懷二月壬寅告常山魏郡

清河鉅鹿平原東平郡太守相曰朕惟巡狩之制以宣聲教者同遐邇解釋結冤也今四國無政不用其良駕言出游欲親知其劇易前祠園陵遂望祀華霍東柴岱宗爲人祈福今將禮常山遂徂北土歷魏郡經平原升踐隄防詢訪耆老咸曰往者汴門未作深者成淵淺則泥塗追惟先帝勤人之德底績遠圖復禹弘業聖跡滂流至于海表不克堂構朕甚慙焉月令孟春善相丘陵土地所宜今肥田尙多未有墾闢其悉以賦貧民給與糧種務盡地力勿令游手所過縣邑聽半入今年田租以勸農夫之勞乙丑敕侍御史司空曰方春所過無得有所伐殺車可以引避引避之駢馬可輟解之詩云敦彼行葦牛羊勿踐履禮人君伐一草木不時謂之不孝俗知順人莫知順天其明稱朕意戊辰進幸中山遣使者祀北嶽出長城癸酉還幸元氏祠光武顯宗於縣舍正堂明日又祠顯宗于始生堂皆奏樂三月丙子詔高邑令祠光武于卽位壇復元氏七年徭役己卯進幸趙庚辰祠房山于靈壽辛卯車駕還宮賜從行者各有差八月乙丑幸安邑觀鹽池九月至自安邑

章和元年八月南巡狩 按後漢書章帝本紀章和元年秋八月癸酉南巡狩壬午遣使者祠昭靈后于小黃園甲申徵任城王尙會睢陽戊子幸梁己丑遣使祠沛高原廟豐粉榆社乙未幸沛祠獻

王陵徵會東海王政九月庚子幸彭城東海王政沛王定任城王尙皆從辛亥幸壽春己未幸汝陰冬十月丙子車駕還宮

和帝永元三年冬十月癸未行幸長安 按後漢書和帝本紀云云

永元十五年九月南巡狩 按後漢書和帝本紀永元十五年九月壬午南巡狩清河王慶濟北王壽河間王開並從賜所過二千石長吏以下三老官屬及民百年者錢布各有差冬十月戊申幸章陵祠舊宅癸丑祠園廟會宗室于舊廬勞賜作樂戊午進幸雲夢臨漢水而還十一月甲申車駕還宮賜從臣及留者公卿以下錢布各有差 按張禹傳永元十五年南巡祠園廟禹以太尉兼衛尉留守聞車駕當進幸江陵以爲不宜冒險遠驛馬上諫詔報曰祠謁旣訖當南禮大江會得君奏臨漢回輿而旋及行還禹特蒙賞賜

永元十六年十一月己丑行幸緱氏登百岨山賜百官從臣布各有差 按後漢書和帝本紀云云安帝延光三年二月東巡狩十月行幸長安 按後漢書安帝本紀延光三年春二月丙子東巡狩丁丑告陳留太守祠南頓君光武皇帝於濟陽復濟陽今年田租芻稿庚寅遣使者祠唐堯於成陽

戊子濟南上言鳳皇集臺縣丞霍收舍樹上賜臺長帛五十匹丞二十四匹尉半之吏卒人三匹鳳皇所過亭郡無出今年田租賜男子爵人二級辛卯幸泰山柴告岱宗齊王無忌北海王普樂安王延來朝壬辰宗祀五帝於汶上明堂癸巳告配二祖六宗勞賜郡縣作樂三月戊辰祀孔子及七十二弟子於闕里自魯相令丞尉及孔氏親屬婦女諸生悉會賜褒成侯以下帛各有差還幸東平至東郡歷魏郡河內壬戌車駕還京師幸太學夏四月乙丑車駕入宮假於祖禰冬十月行幸長安壬午新豐上言鳳皇集西界亭丁亥會三輔守令掾史於長安作樂閏月乙未祠高廟遂有事十一陵歷觀上林昆明池遣使者祠太上皇於萬年以中牢祠蕭何曹參霍光十一月乙丑至自長安

延光四年春二月甲辰南巡狩 按後漢書安帝本紀云云

順帝永和二年行幸長安 按後漢書順帝本紀永和二年冬十月甲申行幸長安所過鰥寡孤獨貧不能自存者賜粟人五斛庚子幸未央宮會三輔郡守都尉及官屬勞賜作樂十一月丙午祠高廟丁未遂有事十一陵十二月乙亥至自長安

桓帝延熹二年行幸長安 按後漢書桓帝本紀延熹二年冬十月壬申行幸長安乙酉幸未央宮